



Gyanesh-i menden metoktsüra
October 2 nungi longkak aittsü: CJP

Rara tembangtsü US dak
keta lir: Pezeshkian

VOL. XXIII ISSUE NO. 346 (ADOK 346) DIMAPUR KÜPTOKNÜ (SATURDAY) RONGJUI (SEPTEMBER) 26, 2026 ₹ 5.00

Interlocutor tasen shimba ya maaksü: NPCC

Kohima, September 25, 2026 (TYO): Indo-Naga political talks atema interlocutor tasen Ajit Lal shimba ya maaksü ulura aser agreements ana sign süa aliba mapa kuma inyaktsü akhanger ta Nagaland Pradesh Congress Committee (NPCC)-i tanü metetdaksüogo.

"Congress-i agreement ana mapang atsülanga moi mapa kuma inyakdaksünür aser iba ya ajak densema inyaktsüla" ta NPCC president aser Lok Sabha MP S Supongmeren Jamir-i ashi.

"Asenok ket nung akhümket agreements ana lir aser telok ajak dena mapa kuma inyakdaksünür. Onoki yimten latettsüba atsülanga moudaktsünür" ta pai ashi.

"Naga olemtep atema interlocutor tasen ka shimba ya

taaktsüka lir. Olemtep tembangogo aser joko agreement nung aliba onüktem mapa inyaka aotsü dang anünga lir" ta Supongmeren-i ashi.

"Agreement agia aliba ama mapa inyaktsü melena ano interlocutor ka yokba ya Nagaland asoshi maaksü lir. Mapaji interlocutor ka ajanga masü saka ministerial level nung inyaktsüla" ta paisa ashi.

"Nübertemi olemtep atsülanga aiba laktetogo anungji Congress-ibo Naga yimten tebilemtsü ya tekaratiba nung angatetteptsü akhanger" ta NPCC working president C Apok Jamir-i ashi.

Framework Agreement sign süteper küm 11 aser Agreed Position sülen küm 9 tashi süia arur ta Apok-isa ashi.

CSU-i Ratna Infra base camp shibangtsüogo



Kohima, September 25, 2026 (TYO): Chakhesang Students Union (CSU)-i Phek district kübok North Kikruma nung M/s Ratna Infrastructure Project Pvt. Ltd. indang base camp shibangtsüogo.

NH-29 Kohima-Jessami Road mapatong atema mapang aiben atsülangaka contractor-i mapa metembangba atema CSU-i iba mapa inyakogo aser parnokisa NHIDCL dang ghonda 72 tsünga firm mapa anentsütsü aser re-tender asütsü mapang züngzüksüogo.

"Onoki tesüiba küm ana tashi iba onük jembia arur aser mapang atsülangjaka contractor-i pai nangzüka ama meinyaktet. Onoki joko maremzüker" ta CSU president Povoza Soho-i ashi.

CSU-i EPC contractor mapa anentsütsü aser 72 working hours tsünga fresh tendering asütsü takhangba agütsüogo.

"Chakhabama-Kikruma stretch telongtet NH-29 package ya October 10, 2023 nü Ratna Infrastructure Projects Pvt Ltd nem lemyütsü aser contractual completion date ji January 4, 2026 liasü" ta CSU general secretary Rhilo Chiero-i ashi.

Contractor-i lateta aliba mapang tsünga metembangtetaka National Highway & Infrastructure

Development Corporation Limited (NHIDCL)-i September 24 tashi extension agüja liasü aser iba mapangji yashi tembangogo ta pai ashi.

Iba mapatong nung mapa 44.30% dang inyaka lir aser mapang talangka atsülanga aruba ajanga nübertemi timtem kanga ajurur ta Chiero-isa ashi.

Iba lenmang ya Phek, Meluri aser Kiphire dena temeket district tem asoshi kanga tongtipang lir. Ajisüaka lenmang majungba agi lendong balala ataloker aser rongsenketzüng tsütsü takoksa aika ajurur ta paisa metetdaksü.

CSU, NHIDCL aser contractor tsünga June 22 nü six-point agreement ka nung sign süteper saka contractor-i nüngdakba machinery, nübo aser maintenance magütsütet. Iba jagi tanü CSU-i contractor indang base camp shibangtsüogo aser takhangba agütsü magizükra package kübok mapa inyaka moudaktsütsü ta metetdaksüogo.

NHIDCL-i contractor manentsüra aser 72 working hours tsünga fresh tendering mesütetra September 30 nungi national highway ajunga mokdangtsü ta CSU-i Executive Director (Projects), NHIDCL Regional Office, Kohima dang shidi ka ajanga metetdaksüogo.

Yi temeyoktep tamajung ajemba ajanga nisung 8 asü

Mokokchung, Rongjui/ September 25(TYO): Mokokchung Police osang ajanga metetdaksüba agi Mangkolemba nung adulterated MC Rum yi tamajung ajemba ajanga September 24 nü nisung 4 asü, aser ano Mangkolemba nungsa kasa yi tamajung ajemba ajangasa September 25 nü nisung 2 asü.

Iba tatalokba dak ajemdaker Mokokchung Police-i Case No.002 U/S 105 BNS, Sections 44(a),(c),(d)&(e) NLTP Act nung register sür bushitsüngdang agidagi aser iba

dak sentakba nung temelung melemteti tang tashi nung Police-i nisung 6 pua lir aser adulterated yi-a ishika bendena lir ta kasa osang nungsa metetdaksü.

Ano maneni Mokokchung nungi kilometre 25 shi pilar aliba Satier nunga September 25 nü nisung 2 asü, tena ya kinüngtsü aser kinüngbo lir aser tena ya tangar lu nung mapa inyaka alu nungji alir, tenati September 24 aonung yi alia kidangi bener aruagi ajem aser September 25 nü kinüngboji anepdang 10 ko

meta asü aser kinüngtsüji mozüki bushia bener aorba len tom nung nikongdang 3 Ako meta asüba osang lir.

Mokokchung Police-isa nübertem dang kanga dang kümdanga alitsü metetdaksüba den külemi yi ajemba ajanga tera danga timtem ajurura tekaratiba nung mozüki bushia aotsü metetdaksü.

Kasa sangdong nungsa Mokokchung Police-i yi ayoker kar danga putetra aser metetra tekaratiba nung Police nem metetdaksütsü asoshi nübertem dang metetdaksü.

Manipur, Nagaland aser Arunachal nung AFSPA atsülanger

Guwahati, September 25, 2026 (Agencies): Centre-i Manipur, Nagaland aser Arunachal Pradesh kübok tesem kar nung Armed Forces (Special Powers) Act (AFSPA), 1958 atsülangba metetdaksüogo.

October 1, 2026 nungi tenzüka ita trok atema AFSPA atsülanger ta September 25 nü Gazette notifications nung shia lir.

Northeastern state asem nung tensa meyipa reprangshiba sülen AFSPA atsülangtsü telemtetba agiogo. October 1 nungi tenzüka notified areas nung ita trok atema AFSPA mapa inyaktsü ta Centre-i ashi.

Ministry of Home Affairs-i Manipur nung state ajunga "disturbed area" ta

sangdongogo. Ajisüaka iba nung District pungu kübok police stations 13 telongtet maden.

AFSPA kübok madenba tesemtemji Imphal West nung Imphal, Lamphel, City, Singjamei, Patsoi & Wangoi police stations; Imphal East nung Porompat, Heingang & Irilbung; Thoubal nung Thoubal police station; Bishnupur district nung Bishnupur & Nambol aser Kakching district nung Kakching police station lir.

Nagaland nunga district tugu-Dimapur, Niuland, Chümoukedima, Mon, Kiphire, Noklak, Phek, Peren aser Meluri nung AFSPA atsülangogo.

Item district ya AFSPA nung Section 3 kübok "disturbed

areas" ta sangdongogo.

Maneni, district pungu-Kohima, Mokokchung, Longleng, Wokha aser Zunheboto nunga police stations 21 nung AFSPA atsülangogo.

Arunachal Pradesh nung Tirap, Changlang aser Longding district tem nung AFSPA atsülangogo.

Maneni, Assam den arrtsüa aliba Namsai district nung Namsai, Mahadevpur aser Chowkham police stations nung AFSPA atsülangogo.

Armed Forces (Special Powers) Act nung Section 3 ajanga Centre sorkari armed forces amshitsü nüngdak ta ajitetba tesem dang "disturbed area" sangdongtsü tashi agütsür.

NPCC-i CEC Gyanesh Kumar mapa nungi anentsü akhanger

Kohima, September 25, 2026 (TYO): Chief Election Commissioner Gyanesh Kumar-i tashiyim agi electoral rolls indang Special Intensive Revision (SIR) lemtettem agiogo aser pai Election Commissioner ana den asüngdangya masü anungji pa mapa nungi anentsüla ta Nagaland Pradesh Congress Committee (NPCC)-i takhangba agütsüogo.

NPCC working president C Apok Jamir-i tawa Indian Express bushisüngdang indang osang lemsatepdang Election Commissioner ana-Sukhbir Singh Sandhu aser Vivek Joshi nati ita 10 tsünga 14 ben tashi SIR maparen dak sendakba lemtettem aser tetuyubatem atema ashishitep ta ashi.

Item tatalokba ajanga Chief Election Commissioner-i commissioner ana den masüngdangtepa telemtetbatem

agi aser iba ya CEC indang inyakyim den meputep lir ta Apok-i ashi.

"Pai tebilemtsü khuret bena mapa nungi anentsüla. Iba maparen ajanga linük electoral aser democratic maparen nung tetsükdaksü bentsür arutsü" ta paisa ashi.

Züngsem aika aliba constitutional body ka nung tebilemba balala asübaji yimya dang aser SIR dena lemtet ajak külemi agi ta Election Commission-ibo ashir.

Nagaland nung SIR exercise ya tashishitsü melii aser lateta aliba ama inyakra Congress-i pusema nungittsü. Iba nung ashishitep kecha mali saka Nagaland e-rolls nungi nisung lakh 1 tema agienba atema tebilemtsü abener ta Apok Jamir-isa ashi.

Kuli tejangja nung ajemdaker ang tenüngtem agientsüla aser

tim masübalen agi agienra magizüksü ta paisa ashi.

Form 6 nung tsürabur tenüng meshiba atema ashishir, kechiyong iba ajanga tenüng agütsürtem indang background asadangtsü aser agizüktsü mesüra magizüktsü lemtettsü ta Apok Jamir-isa ashi.

Bihar aser West Bengal dena state aika nung electoral-roll revision nung tim masübatem lir. Election Commission ya autonomous constitutional body ka lir anungji tashishitsü melii ketdangtsüla aser nübertemi tamang akatsüsa inyaktsüla ta NPCC working president Apok-isa ashi.

CEC Kumar-i pa mulungka agi dang lemtettem agiba aser tenokdangbatem agütsüba ya sensotem temeten anema lir anungji pai mapa nungi anentsüla ta Congress-i akhanger.

Angh-i NKVIB ketdangsür den senden amen

Dimapur, Rongjui/Sept. 25 (TYO): Nagaland Angh Nand Kishore Yadav-i Nagaland Khadi & Village Industries Board (NKVIB) indang ketdangsürtem den parnok inyaksangshi asadanga senden ka Lok Bhavan, Kohima nung September 25, 2026 nü mena liasü.

Iba senden nung Board ketdangsür temi state nung par inyaksangshi, sentong, takok anguba aser Khadi, village industries, entrepreneurship, skill development aser employment generation ajungkettsü atema inyakba indang lemsatepa liasü.

Iba mapang NKVIB ya State sorkari Nagaland Legislative Assembly Act No. 5 of 1978 kübok tentet aser January 1979 nungi maparen balala inyaka arur ta metetdaksü. Khadi and Village Industries Commission (KVIC) den apat mapa tem inyaksü asoshi lir ta ashi.

Senden nung Prime Minister's Employment Generation Programme (PMEGP) mapatong inyakba repringtepa liasü.

Iba scheme kübok kija artisans, entrepreneurs, institutions aser societies nem self employment aser village industries ajungkettsü atema senotsü teyari agütsür ta ashi.

Iba sentong kübok entrepreneurs aser talisa mapa mangur lanurtem küm shia units 600-700 amenoker, ta ashi.

Board-isa tesüba küm asem tsungta district shia PMEGP inyakyim indang lemsatepa liasü. PMEGP e-portal nung aliba ama 2023-24, 2024-25 aser 2025-26 atema NKVIB targets aser bank sanctions tem repringtepa liasü.

Senden nung bank sanctions ajema aliba, demands for collateral, ken o kar nung loan peria manguba aser rural braches nung credit processing meilongi inyakba densema PMEGP inyakyim nung tayongzükba ajurubatem indanga jembia liasü.

Multi Disciplinary Training Centre (MDTC), Dimapur inyakyim indanga asadanga liasü. Iba centre ya KVIC temelaba nung yanglu, kong mapa mangu aliba lanir nem pei units amenoktsü aser self employment atema trades balala nung training agütsür.

Tang weaving, knitting, tailoring and embroidery, leather work, carpentry, laundry soap making, beekeeping, Entrepreneurs Awareness Programme aser Entrepreneurs Development Programme densema training balala agütsür.

Board-i North Eastern Council (NEC) kübok tang teinyakdak aser renemer aliba ki o jen indang osang lemsatepa liasü. Yangji Agri Expo, Dimapur nung Common Facility Centre and Emporium for Handloom and Handicraft aser Diezephe, Dimapur nung Centre for Promotion of Indigenous Handloom and Handicrafts dena lir.

Diezephe centre ya handicraft products indang training aser production atema maongka agütsütsü aser indigenous handloom and handicrafts ajungkettsü nükjiding nung amenokba alitsü.

Senden nung ano Kohima nung Handicraft Facility Centre yangluba indanga jembia liasü, koba April 1, 2026 nü nungi yanglu tenzük aser ano merenemi lir. Parnoki Angh dang Kohima nung Common Facility Centre-cum-Training Centre indanga lemsatep, koba terenemer lir aser skill acquisition, skill upgradation, employability aser self employment nung yaritsü.

Parnoki Dimapur nung Khadi Plaza yakta semzüksü imlar ta Angh dang ashi.

Board ajangasa tarutsü sentongtem indanga lemsatepa liasü.

DC Chümoukedima-i Kukidolog nung bamboo markets semzüksü



Dimapur, Rongjui/Sept. 25 (TYO): Deputy Commissioner, Chümoukedima, Polan John, NCS-i September 25, 2026 nü Kukidolog, New Medziphema (Jharnapani) aser Medziphema nung bamboo market stalls 20 semzüksüogo.

Iba maparen ya Medziphema Administration, Chümoukedima ajanga IDBI Bank teyari nung inyaka liasü. Sentong tenzuka Pastor Thefu Krodo, Jharnapani ajanga sarasadem.

DC Chümoukedima, Polan John-i iba sentong nung jembidang, IDBI Bank ajanga yariba asoshi pelaba lemsatep aser tarutsü nunga District Administration, Financial Institution aser nüburttem lungjemer maparen balala inyaksü indang jembia liasü.

Pai shilem agirtem dang pei aliba tesem nung adokba oset yoka takum jenjang tajungba akumtsü asoshi item market stalls anepalua amshitsü ayongzuka liasü.

Nüburttem nem maongka agütsütsü aser ajak külemi rongsenketzung nung aintsü asoshi District Administration-i maneni yariteptsü, ta pai ashi. DC-i item tesem nung power atema solar panels inoktsü ta metetdaksü aser putu menden dang itemji kanga junga anepalua amshitsü ayongzuka liasü.

ADC Medziphema, P. James Swu-i sentong tenzuka jembidang aluyimer, producers, entrepreneurs aser vendors nem pei sasa yanglutetba aser züsentetba sayua yokdaksütsü nükjiding nung bamboo market ya amenok, ta ashi.

Taoba NBDA chairman Albert Ezung tenati mapang talangka nungi bamboo market ya amenoknüa liasü aser tanübo asangsang kumogo, ta pai ashi.

Pai iba inyakyim nung temulung asüba lemsatep, koba ajanga bamboo products ajungkettsü aser local artisans aser entrepreneurs yaritsü.

IDBI Assistant General Manager, Zubenthung Jami-i iba mapatong nung külem sür inyaksü atema IDBI Bank shimba atema District Administration dang pelaba lemsatepa liasü.

Iba ama maongka agütsütsü atema lungjemer inyakba atema administration dang pelaba ashi aser tarutsü nunga maneni lungjemer inyaksü imlar ta shia liasü.

Iba market semzüksüba sülen DC Chümoukedima, Polan John; ADC, Medziphema, P. James Swu; EAC Medziphema, Vithwel Kweho; RO, ThejavizoNakhro aser bank ketdangsür temi piggery, poultry, rabbit aser cattle farms tem semdanga liasü.

Kohima nung ODOP indang workshop ayongzük

Dimapur, Rongjui/Sept. 25 (TYO): Pickle nung rangloker anogo ka One District One Product (ODOP) indang workshop September 25, 2026 nü Deputy Commissioner, Kohima indang Conference Hall nung ayongzuka liasü.

Deputy Commissioner, Kohima, B. Henok Buchem, NCS-i iba sentong ayongzükba nükjiding lemsatepba mapang, ODOP yagi local resources, yimsü aser nüburttem dak tera yanger products tem jangjatetsü, tashi itshitsü aser ajungkettsü atema tongtipang maongka agütsür, ta ashi.

Iba maparen ya production kisung nung metembang poksunga aliba, local entrepreneurs yariba aser rongsenketzung tashi itshiba nunga yaritsüla, ta pai ashi.

Nagaland nung chiyongtsü, aonsotsü, spices aser alu nungi züsentetba tabu balala den akhi

mapang nungi chiyongtsü meraksadaksüi kumzuka ayuba yimyatem lir, ta ashi. Akhi mapang nungi amshiba shisatsü aser modern food-processing techniques tem meyokteper talisa mürekmejuba, quality control, packaging, branding aser marketing nung amshitsüla, ta DC Buchem-i ashi.

Pickle quality tajung yanglutsü ya mezüngbuba mera kisung lir aser materials tajung bendena packaging, branding, transportation aser market access tem tashi itshitsü nungdaker, ta pai ashi. Paisa food safety, certification, quality aser shelf life indanga jembia liasü.

Naga nunger chiyongtsü nung teimla tajung aliba indang lemsatepa, state telungzük aser alema oaamshitetsüsa yanglutetsü, ta ashi. Pai iba sentong nung shilem agirtem dang market ulushitsü atema digital sapang tem aser e-commerce

amshitsü aser supply shidak agütsütsü ajungmesoa liasü.

Technical sessions nung branding aser packaging, food safety and compliance, NABARD support for ODOP onüktem nung rangloker jembia aser ODOP entrepreneur kati ajangshiba lemsatepa liasü.

Iba workshop nung Inspector of Industries, District Industries Centre (DIC), Kohima, Kedozolie Nagi menden liasü, kong ketdangsür, entrepreneurs aser stakeholders tem adenshia ODOP mapatong kübok maongka, tayongzükba aser teyari lenmangtem indang jembia liasü.

Sentong nung General Manager, DIC Kohima, Ahunle Tep-i pela agizükba o jembia aser Functional Manager, DIC Kohima, Jessy Jurry-i "ODOP Initiatives and Avenues for Entrepreneurs" onük nung ajemdaker jembia liasü.



September 25, 2026 nü Kohima nung Tourism & Higher Education Minister, Temjen Imna Along-i #SevaSankalpAbhiyan kübok Tree Plantation Programme tenzüksüba sülen tangokba noksa nung angur. Iba sentong tenzüksüba sülen Minister Temjen Imna Along official quarter MH 10 aser Secretariat Road nung süngdong atem. Iba sentong nung BJP state office bearers, party otongdarterem, Morchas aser Karyakartas aden. Iba sentong ya Ato kilonser Narendra Modi-i lokti lenisüba küm 25 ajungba nungtem nung among.

Yi temeyoktep tamajung ajemba ajanga nisung 8 asü

Mokokchung, Rongjui/September 25 (TYO): Mokokchung Police osang ajanga metetdaksüba agi Mangkolemba nung adulterated MC Rum yi tamajung ajemba ajanga September 24 nü nisung 4 asü, aser ano Mangkolemba nungsa kasa yi tamajung ajemba ajangasa September 25 nüa nisung 2 asü.

Iba tatalokba dak ajemdaker Mokokchung Police-i Case No.002 U/S 105 BNS, Sections 44(a),(c),(d)&(e) NLTP Act nung register sür bushitsüngdang agidagi aser iba dak sentakba nung temelung melemtetit tang tashi nung Police-i nisung 6 pua lir aser adulterated yi-a ishika bendena lir ta kasa osang nungsa metetdaksü.

Ano maneni Mokokchung nungi kilometre 25 shi pilar aliba

Satier nunga September 25 nü nisung 2 asü, tena ya kinungtsü aser kinungbo lir aser tena ya tangar lu nung mapa inyaka alu nungji alir, tenati September 24 aonung Yi alia kidangi bener aruagi ajem aser September 25 nü kinungboji anepdang 10 Ako meta asü aser kinungtsüji mozüki büshia bener aorba len tom nung nikongdang 3 Ako meta asüba osang lir.

Mokokchung Police-isa nübortem dang kanga dang kümdanga alitsü metetdaksüba den külemi yi ajemba ajanga tera danga timtem ajurura tekaratiba nung mozüki büshia aotsü metetdaksü.

Kasa sangdong nungsa Mokokchung Police-i yi ayoker kar danga putetra aser metetra tekaratiba nung Police nem metetdaksütsü asoshi nübortem dang metetdaksü.



September 25, 2026 nü New York nung 'IBSA Foreign Ministers' senden nung India External Affairs Minister S Jaishankar, South Africa Minister of International Relations & Cooperation Ronald Lamola, Brazil Foreign Affairs Minister Mauro Vieira aser tangartem adenba noksa nung angur.

Gyanesh-i menden metoktsüra October 2 nungi longkak aittsü: CJP

New Delhi, Rongjui/September 25 (Agencies): Hokolbarnü Cockroach Janta Party (CJP) tentetsang Abhijeet Dipke-i, Chief Election Commissioner Gyanesh Kumar-i Honibar (September 26) tashi nung menden metoktsüra CJP-i October 2 anogo nungi tenzüka longkak aittsü, ta metetdaksügo.

Dipke-i X ajanga, CJP-i Gandhi Jayanti (October 2) nungi Mumbai nung longkak ait tenzütsü aser India nung aliba yimitem nung longkak aittsü, ta metetdaksü.

Dipke-i, "Asüng tashi nung Gyanesh Kumar-i menden metoktsüra CJP-i October 2 nü Mumbai nungi tenzüka longkak aittsü aser India nung aliba yimitem nung longkak aittsü. Taruba Gandhi Jayanti nung asenoki democracy kümzütsü atema tenangzüka agidi," ta metetdaksü.

Brihostibarnüa Dipke-i Kumar dang menden metoktsüra CJP-i "Jantar Mantar 2.0" tenzütsü, ta amokmerena liasü. Dipke-isa election inyakyim nung ochimashi liaka opposition party temi maneni election nung shilem agiba atema aittsü.

Item ama election nung shilem agiba ajanga ochimashi pusemba sayur, ta pai ashi.

"Atangji elections nung ochimashi lir, ajisüaka nenoki maneni election nung shilem agira ibaji ajanga nenoki elections metentsüba sayur aser

election ji ochishia timi agir ama sayur," ta Dipke-i metetdaksü.

Election Commissioner ana-Sukhbir Singh Sandhu aser Vivek Joshi nati tesüiba ita ter tsüngda 14 ben tashi voters züngokba, agienba, tanaben agizükba aser voters registration inyakyim dak sendakba nung tashishiba agüja liasü, ta report ka sangdongba sülen CJP aser opposition party temi CEC Kumar menden nungi anentsü akhanger.

Ajisüaka Election Commission-ibo, SIR dak sendakba teletmetbatemji ajaki melunga aser election commissioner ana den chief election commissioner-i melunga agizük ta ashir.

[8:52 PM, 9/25/2026] Tansen-App: J&K assembly nung CM Omar-i statehood bangzüng ka benok

Srinagar, September 25 (Agencies): Hokolbarnü assembly nung Jammu & Kashmir Chief Minister Omar Abdullah-i tangsa J&K nem state jenjang agütsüsüla, ta takhangba agütsüba bangzüng ka benokba sülen BJP MLA temi iba bangzüng anema longkak ait.

Question Hour sülen Chief Minister-i bangzüngji benoka India sorkar dang memeno Jammu & Kashmir nem state jenjang agütsüsüla, ta takhangba agütsü.

Bangzüng nungji yamai shia lir, "Iba House nung 2000 küm June 26 aser 2024 küm

November 6 nü agizükba bangzüngtem dak alia iba House-i India sorkar dang tangsa Jammu & Kashmir nem state jenjang agütsüsü akhanger aser iba bangzüng ya India sorkar nem agütsüsü bangjemer."

Omar-i züngsemtem dang, senden maneni agitsü aser iba bangzüng dak sendakba nung Hombarnü o lemteptsü akok, ta metetdaksü.

Senden nung BJP MLA temi 2000 autonomy bangzüng züngokbaji ashishia longkak ait. MLA R.S. Pathania-i, senden nung autonomy atema o lemteptsü asoshi party-i memelatsü, ta ashi aser tanüngba BJP züngsemtemia kasa tashishiba agütsü.

Iba sülen opposition MLA tem sabangleni oa sorkar aser iba bangzüng anema yimiyim ayima longkak aita liasü.

BJP MLA tem karibo mendeni tua yimiyim ayim aser kari iba bangzüngji shisaa indok.

2019 küm August ita nung Centre-i Arlla 370 agienba sülen J&K ya union territory ka kümja liasü. Iba mapang nungjagi tenzüka ruling teloktep nungi züngsemtemi Centre dang state jenjang tanaben agüjang ta akhanger.

Parnoki Parliament nunga iba takhangba agütsü, Supreme Court nem-a temepishiba agütsü aser 2024 küm Lok Sabha election mapang nunga kasa takhangba agüja liasü.

Ayushman Bharat scheme ajanga nisung cr. 13 ajangzükogo: PM Modi

New Delhi, September 25 (Agencies): Nüburtem nem jenjang dalam agi healthcare service tajung agütsüsü nükjidong nung küm 8 tejaklen sorkari Ayushman Bharat scheme tenzüka sülen tang tashi nung iba scheme ajanga nisung crore 60 ayimjemogo aser iba scheme ajanga nisung crore 13 dak temai tajangzük nguogo.

Iba scheme kübok nisung crore 13-i sen 2 lakh crore jenjang medical treatment agiogo, aser ibaji empanelled asüba sorkar aser nija hospital 39,000 ajanga liasü.

Iba scheme küm 8 abensaba mapang Ato kilonser Narendra Modi-i X ajanga, Ayushman Bharat ajanga nisung million aikati healthcare teyari nguogo; iba ya alima nung health

assurance scheme tulutiba lir, ta metetdaksü.

Paisa, "Iba scheme kübok nisung crore 60 dak temai küm shia sen lakh 5 health cover angutsü. Iba scheme ajanga kibongtemi medical treatment nung indoktsü aliba sen aika kümzükögo, sensakertem aser middle-class kibongtem aika ajangzükogo," ta ashi.

Union health minister J P Nadda-ia, iba scheme ajanga nisung crore 60 ayimjemer aser 48.5 crore-plus cards yangluogo, ta metetdaksü.

Paisa iba scheme ajanga kibong aika medical sentsüh nungi kümzüka, shirangertemi mapang shidak nung treatment agitetba aser kibongtemi senotsü atema tebilemtsü makai shirangertem anepalutetba metetdaksü.



September 25, 2026 nü Amritsar nung BJP lenir Akshay Sharma den party nung inyakertermi 'Nasha Mukht Punjab Yatra' nung shilem agiba noksa nung angur.

BrahMos Missiles ajanga Pakistan nunger ayip-majanger: Amit Shah

New Delhi, September 25 (Agencies): Hokolbarnü Union Home Minister Amit Shah-i, Uttar Pradesh nung yangluba BrahMos missiles ya ajanga state nung defence osettem yanglutetba tsütsü terenlok aliba temaitsü sayur, ta metetdaksü.

Paisa, UP nung yangluba BrahMos missiles ajanga Pakistan nunger ayip-majanger, ta ashi.

Greater Noida nung aliba India Expi Centre & Mart nung 4buba Uttar Pradesh International Trade Show (UPITS) nung jembidang Shah-i, state nung defence osettem yangluba ulushiba ajanga industry nung temelenshi adokba sayur, ta ashi.

State yimtiba, Lucknow nung aliba BrahMos Integration & Testing Facility Centre dak sendakba nung Shah-i, "Tanübo UP nung yangluba BrahMos missiles ajanga Pakistan nunger amoi junga moudaktsür; iba ya ajanga temelenshi aliba temaitsü sayur," ta ashi.

Paisa, Amethi nung AK-203 assault rifles yangluba ya ajanga UP nung defence osettem yangluba tsütsü terenlok aliba tatishitsü sayur, ta ashi.

Uttar Pradesh Defence Industrial Corridor trokprongla-Jhansi, Chitrakoot, Lucknow, Agra, Aligarh aser Kanpur nung sen jenti indoka inyaker, ta pai ashi.

Lucknow nung aliba

BrahMos facility ya yaküm May ita nung semzüka liasü. Iba facility nung supersonic cruise missile lokteper aser tendanger. Iba facility nung mezüngbuba shilem nung yangluba BrahMos missiles ji yaküm October nungi amshi tenzükögo.

Iba centre yangludang sen crore 300 shi indoka liasü.

Union Minister Shah-isa, alima nung tayongzüka balala liaka India nunger rongsenketzüngbo maneni indar, ta metetdaksü.

"Ato kilonser Modi lenisüba kübok asenoki linük aika den Free Trade Agreements (FTAs) tezüngzüktep agiogo. Item tezüngzüktep ajanga industries oset export asüba jenjang tajungba kümogo aser tayongzüka jenti liaka asen rongsenkettzüng maneni ainer," ta pai ashi.

Home minister-isa, UP nung One District, One Product (ODOP) mapatong ajanga mapa maongka aika adokdaksür aser local industries nungiter, ta metetdaksü.

Paisa, tamalenbo lanurtemi mapa bushia state toktsür tangaleni ao saka tangbo local business ainba ajanga state nung mapa maongka aika angur, ta metetdaksü.

4buba Uttar Pradesh International Trade Show (UPITS) ya September 25 nungi September 27 tashi agitsü.



September 25, 2026 nü Shimla nung Himachal Pradesh Deputy Chief Minister Mukesh Agnihotri, state AICC in-charge Rajani Patil, state party Tir Vinay Kumar aser party nung inyakertermi State Election Commission office kima Chief Election Commissioner (CEC), Gyanesh Kumar anema longkak aitba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 26, 2026

CEC Gyanesh Kumar-i aibelena lir asü?

- P Tiamongba Aier

Tesüiba ita 10 tsüngda India nung Election Commissioner asem rongnungi anati terpezüben tashi ECI lemtet balala aser tetuyubatem magizükba osang yimjaki adokba sülen Opposition-i anir telok balala aser kijatemi Chief Election Commissioner Gyanesh Kumar mapa nungi anentsü takhangba agüja arudar. Election Commissioner ana- Sukhbir Singh Sandhu aser Vivek Joshi nati voter registration, deletion & restoration of names, electoral rolls dak sendakba appeals aser voter-data systems access inyakyim dena aika nung ashishitepa liasü. Tatalokba kar nungbo ECI lemtettem tena nem memetdaksüi agiba mapang ajurua liasü ta ashir. Ajisüaka, Election Commission-ibo Special Intensive Revision (SIR) dak sendakba telemtepa ajak parnok külemi dang agi ta ashir. ECI-i electoral-roll meyipa reprangshiba maparen inyakba nung nisungtemi ita aikati ashishitepa aruba sülen iba ken o ya temai adoka jembir. EC ana- Sandhu aser Joshi nati lemsatepba onüktem rongnung Form 6 dak sendakba tebilemtsü lir. Iba Form 6 ya nisungtemi voters akümtsü atema amshir. Iba form nung declaration tasen ka bendenlok aser iba ya taoba SIR indang electoral roll nung tsürabur mesüra tetsü-tebou nung dena lir asü mali ta asüngdang. Taküm May ita Joshi-i iba declaration magizük aser pai sendaktepa aliba declaration meyanglushi tashi statutory form melenshitsü makok ta ashir. Sandhu-ia iba inyakyim melenshitsü tashi mali aser melenshitsü özüngi memelar ta shia liasü. Tenati electoral rolls nung tenüngtem additions, deletions aser restoration nung ashishitep. Tenati Electoral-roll database ka akümba asoshi ashishi aser Electoral Registration Officers ket nung voter lists ayutsü systems peria mali ta ashir. Election Commissioner anaprongi ECI indang IT systems nung temelenshi asüba atema Cabinet Secretary T V Somanathan den-a ajurutepa electoral-roll data ketdangsüba aser security atema tebilemtsü balala lemsatepa liasü. Iba osang ya yimjak nung madokdang nungi Opposition party temibo CEC Gyanesh Kumar mapa nungi anentsü takhangba agüja aruogo. March 12, 2026 nü Lok Sabha aser Rajya Sabha nungi Opposition MP temi pa mapa nungi anentsütsü notices agüja liasü. Lok Sabha notice nung signature 130 aser Rajya Sabha notice nung 63 liasü. Parnoki agütsüba notice tem nung ECI ajanga SIR exercise inyakba nung ashishitep aketba onüktem aser tejak repranga aser bendanga inyaksangshiba indang shia liasü. Ajisüaka, April 6, 2026 nü Lok Sabha Speaker Om Birla aser Rajya Sabha Chairman C P Radhakrishnan naprongi Opposition-i züluba shiditem magizük. Iba sülen, Opposition MP 73-i April 24, 2026 nü Rajya Sabha nung notice tasen ka agütsü aser iba nung tim masüba inyakyim tugu tashi tuteta metetdaksü. Ajisüaka, Indian Constitution nung Election Commissioner ka agienba dang nungi Chief Election Commissioner ka agentsü inyakyim kanga tasak yanglua lir. Constitution nung Arrla 324(5) kübok CEC kaji Supreme Court judge ka anentsüba den kasa asütsü lateta lir. Ano Arrla 124(4) ajanga Parliament nung House anaprong, aser House shia nung nübo teimtibai pusem nung dang aser vote agidang asemisü nungi anasü agi mulung nung dang CEC ka mapa nungi anentsü lateta lir. Ano, iba inyakyim ya Judges (Inquiry) Act, 1968 aser Election Commission ketdangsüba 2023 law nunga densema lir. Tetezü notice ka agütsüba kija agi CEC ka magientettsü saka lateta aliba parliamentary aser inquiry maparen inyakba sülen ang agentettsü. Supreme Court nung Bihar nung SIR ashishitep ken o benoka angadangogo. May 27, 2026 nü Chief Justice Surya Kant aser Justice Joymalya Bagchi na adenba Bench-i Bihar nung ECI-i SIR inyaksü lemtetbaji Constitution nung Arrla 324 den Representation of the People Act, 1950 nung Section 21(3) ajanga melar ta oshidang agüja ECI metentsü. Ajisüaka, tang Election Commissioner ana- Sukhbir Singh Sandhu aser Vivek Joshi nati ola adokba ya odang yutsütsüba masü saka tenati ashishitepba inyakyimtemji jungjunga bushisüngdangtsü nüngdaker. Bihar nung mezüng atema SIR inyakdang sensakertem aser kulikaket peria malirtem kanga timtemdaksüogo aser parnok aika electoral roll nungi züngdoka liasü. Külen, taküm West Bengal nung SIR inyakdang nübo agi tangar memenepertem dak jakdaka tenük yoka inyak aser voters lakh 27 shi e-roll nung agiena liasü. Tawa tu Godda, Jharkhand nunga booth pezü nung election ketdangsürtem aser BJP party züngsemtemi tsüngda SIR maparen nung obang meputep adoka raratepogo. Anungji Supreme Court-i SIR atema ashishitep ken o tem odang meyutsütsüla saka okadak benoka kulitem reprangdang oshidang agütsütsü tim. Election Commissioner tem- Sandhu aser Joshi nati tasüngdangbatem asüngdang anungji Chief Election Commissioner Gyanesh Kumar-ia tena nem telangzübatem agütsütsüla aser magütsütetra pa sasa mapa nungi anentsüla.

OLEMSABANG

Asen Aor

N. Saku Imsong, 4th Mile Diphupar.

Iba olemsapang nung ya aiben dang Aor ya shiba ta temulung nung aiben dang tasüngdangba maneni arua liasü. Aser ya kechiba ozü kin ya Aor ta aja ta küm aika shisadanga aru. Ya odang ajaba masü ta bilemer. Naga nung shinga kina OJANG asem akümba kin mali. Ya oda mezüng yongi Tsüngremi shisatsü agütsür jadaktsüba asü ta bilemer. Israel nung dang masü, saka asen kin yaa Tsüngremi mezünyongi shimtetba ta bilemer, kechiaser Tsüngrem ya-a TEBU, TECHIR aser TANULA TEMESHI, parnok asemprong kadang. Yamaji asen kin nungjaa AOR saka kin ka dang. Asenoki merajemer dang ashi ya Obula, Otsüla nung ya temulung teindang liasü süti ta sa bilema arur. Tambu Clarkba ya tapi agi Tsüngremi yokba masü, kechiyong asen kin ochishir kin ta Tsüngremibo mezüng yongi meteter liasü ta shisateter. Bilemdanga aonung asenok AOR ya inyaksangshi ajak nung Tsüngremi Pa nüngtem nung agütsüba inyaksangshi ajak nungji meteta arur. Tebu, Techir, Tanela Temeshi = 3, AOR = 3.

Yamaji Clark saap mulungjang nung kechiba Aor dangi atutsü par missionia memela sür odang atutsü mulungtet aser atu? Ya dangbo masü. Tsüngremi Aor ya renemtsür liasü ta angateter. Kechiba TONGPOK, LONGPOK, LONGJAKREP, parnok inyaksangshi koma liasü aser lir. Ki asüdag, kima TONGSHI, KILONG TONGSHI,

SÜNGLANG TONGSHI	_____	3.
ANO TSÜIN, KILONG SÜNGLANG	_____	3.
AZÜKLEN HONG kilemden tetsünglen PERLANG	_____	3
MESHI	_____	3
TSÜKden	_____	3 etc.

Anungji asenoki arok aroka shisadanga asen kin ya mezünyongi Tsüngremi shimteter Pa shimtetba nung inyaksangshi ajak inyaka aru ta angateter. Saka iba tashi nungji matemer Tsüngremer maparenbo ajak asen kin dak renemtsür liasü, yamaji lia arur oda oda yim, tzükong, mesemteta pelatepa senshi saka ano konang bushitepa yim o yim na lepteptenzüka adianu agi tsükchir kümer lia aru. Tangar kinbo yim o yim na leptepteba otsü mangashi oda kin karbo liasü süti, saka parnokbo pei kin masü tangar dang alep süti. Saka anüdoklem alirtem asen kin jilu beshia leptepteba liasü ta otsü angashir.

Iba mapang America Mission ajanga Dr. Clark-I yimtsü yimbu dang asüngdang yim akümer dang IMPUR ta ajaba angazüker IMPURJI MISSION CENTER mesemteta küm aika nisungtem melentepa arur tera nüchi küma toktsür parnoki asen Tsürabur Kijungluba lenisüba nung anüdoklen alirtemji nenok nem toktsü ta teka makanger sarasadema parnoki beneraruba temoatsü ajak AOR nem agütsür nüktzü yima par limai ao.

Aji oda nongloktsüba ama anüdoklen alir ajak amongdaksü leptepten anen. Ajidang masü, saka Naga kin ajak leni iba osang bener asen tsürapur kin palala dangi aodang India Army temi parnok CAR nung amen aser asen Tsüraburtemji kecha tai malisür nung süngzü agi CAR nungji sendaker ali nung atsür aoba tatalokba otsü aika lir.

Saka Tsüngremibo AOR ya ni shimtetba kin ta renema ayuba ta ojang kata memelenshi-e rizünga yua liasü, aser tambu Dr. Clark sap den maneni jembimeso, asenok otsütem nung angazükba ama iba mapang ya Dr. Clark molungjang aser tanela nung Assam lenden nung America Baptist Mission mapa inyakyim nung tamakok anguba meteta alinung, pai mission mapaji tesem melenshia inyaksü pa mulungjang nung jembia liasü, anungji pa molung nung kundang lenmang sayutsü atema ASSAM lenden nung alir masü saka Naga kin yang Tsüngremi shimtetba kin asütsü süti ta tanelai jembir.

Iba mapang obola (Ao kin nungi) Süpongmeren ya obola Clark den tesayur inyaka alidang temolong meyipa 1871 küm October nung tzü nung Bapti aser pabo American Baptist Missionary ama züngshi ta angazük. Otsü aika lir saka ajakjibo mezülur, oda asen Aor dangi tamangba yimsü ajanga Tsüngremi koma asen AOR dak saklok, aser pa ain tashi ajak agi asenok melenshidaksü iba indangji shisadangtsü ayongzüker dang asünungji tatalokba ajakji bushia mali.

Yamaji Dr. Clark, Godhula, Süpongmeren, parnok ajanga mezüng Molungkimong (Dekhaimong) yim nungi AO lima ajungalen iba yimsü prokshia ao.

Hai AOR senso tajungtem mezünyongi pa sentong nung züngsemer, nungja koja, inyaksangliir ajak tebu, techir, tanüla temeshi asem den asen tsürabur inyaksangshi ajak 3 dang asüba ya atangji Tsüngremi tetenzük nungi pa nübo ta ashiba sayuba ya meshidanger no. AOR ajanga Nagalima ya NAGALAND FOR CHRIST ta ajar masü no? Shisadangtini.

Ano ajidang masü Nagaland ta jateter mezüng Chief Minister Tsüngremi Aor nem agütsü masü no? T. Ao mezüng masü no, etc mapang ka nungbo shidakba I.A.S angur Nagaland ning kin ajak senteper 17 (Seventeen) rongnungi danger kin ajak senteper 3 asem dang tanüngba ajakji asen dang liasü masü no? tang ya AOR ya kongi aor ya? Tetendangbatem nunga No. 1 – 5, 6 tashi nunga madoker, ya Tsüngremi AOR sendok asü, AOR-i Tsüngrem sendok? Shisa mebulur no? külen AOR tulurtem dang masü saka ajaknung CANCER nungi tenzüka tashidak tulubo ajak AOR teimba TASÜR AOR TEIMBA koda bilemer KECHA MASÜAR NA?

Ano tapak ka lapokti neee-

Hai shi aser tanela nung külem züngsem senso tajungtem kechiba Tsüngremi AOR ya yamai meimerana? Ta aibensa shisadanger, oda asentenshi (Revival) yabo danger kin nem danga tama agütsü nunga junglasür nung ano ya-a asen AOR nemsama tama agütsü. Nagalima tanela milak agi rongdak, hai junga anepaludar ma? AOR nem Tsüngremi pa akaba ajak tokshia agütsüogo junga rizüngdar ma?

Tsüngremi AOR nem agütsüba pa meyonglem ya kenü anogo tabeni arutsü. Tsüngremi AORnem agütsüba ya odang agütsüba masü, saka interest nung amshidaksütsü agütsü, mapang ka nung Tsüngremi Aor dangi sentong aser tetemlok ajak tabeni arutsü, shisa mepulur no? kechi südir süaka danger kin election pelatepa pei vote agütsüyonga, kechisütir süaka asen kinbo clean election ta tenangzüka ajaklen (Nagaland) sangdongerji Naga nung ajak chiyungtsü atema AOR karbosa tepsettsü ta election nükla yuangma (KOKNALIM) asen Tsüngremi tazünger ajak moajangma. Aiblena kar danga zülusema lira tai tokangma. Arung asenok ajak Tsüngrem jak bushiti.

North Carolina nung aliba Arogo ka nung nisung 458 bapti



Septemer 13 nü North Carolina nung aliba Arogo kati ayongzükba baptiba sentong nung tangokba noksa nung angur.

September 25, 2026: North Carolina nung aliba Arogo ka nung nisung 458 baptiba sülen iba Arogo nungji tanela asentenshi temaitsü adokdar.

Biltmore Arogo nung pastor, Bruce Frank-i online ajanga, "Tanü Biltmore Arogo nung nisung 458-i Yisu agizüka baptiba ngua pelar. Nisungtem kümzükba aser tangar den lemsatepba Arogo ka atema Tsüngrem dang pelar," ta metetdaksü.

September 13 nü baptiba sentongji North Carolina nung aliba awatsüng ka nung agia liasü. Küm 137 tejaklen iba Arogo tenzükba sülen Arogo otsü nung anogo ka kija nung nisung teimtiba baptibaji iba anogoji liasü.

Yaküm-a kasa Arogo nung

kenüyongi nisung 389 baptiba ajanga otsü tasen ka yanglu saka tawa iba sentong ajanga ano otsü tasen ka yanglutetogo, ta pastor-i ashi.

Arogoi Facebook ajanga, "Nisung 458-i telemtetba agia baptiba aser tejenba taküm toktsür Yisu ajanga taküm tasen tenzükba yimjak nung sangdongba atema onoki benjungteper. Tsüngremi mapa inyakdar aser taküm aika melenshidar. Iba atema benjungteptsü temsüa lir. Yisu, Nü dang pelar," ta metetdaksü.

Tesüiba küm aika küm shia America tesem balala nung nisung jenti baptir, aser iba ya ajanga tanela asentenshi milak jangruba temaitsü sayur.

Tawa UK nunga mejangjaba nisung 170 dak

temai telemtetba agia baptia liasü. Parnoki BibleLadUK account nung post ka anguba sülen baptitsü telemtetba agia liasü; Florida nunga tepuokdak alir nisung 70 bapti aser Florida nung aliba tzüymküm ka nunga The Church of Eleven22-i ayongzükba sentong ka nung nisung 2,552 baptiogo.

Taküm May 24 nü "Baptize the World" sentong nung linük 49 nung nisung 17,900 dak tali baptia liasü. Tang tashi nung iba movement ajanga Arogo 1,600 dak tali longjemdaksüogo aser tesüiba küm ana tsüngda nisung 50,000 dak tali baptiogo.

Sangküm "Baptize the World" sentong ya Pentecost Sunday, May 16 nü agitsü.

Osangtajung Luk ASL ajanga narongjaker million 70 ayimjemtsü

September 25, 2026: Alima tesem balala nung tenarong tajakpurtem mesüra tenarong agi junga mangashibapurtem atema biblical media company Revelation Media - i International Mission Board (IMB) den senteper osangtajung Luk kaket sign language nung yangluogo.

Animated resource nungji osangtajung Luk kaket ajak American Sign Language (ASL) nung adokogo. Screen tsünglanglenji sign-language ratettsür mali saka nisung tapu balalai dang sign language ajanga jembir.

Luke ASL resource ya narongjakertem nem Yisu Khrista meteta kümdaktsütsü nükjidong nung adok, ta IMB-i metetdaksü.

Iba resource adokertemi ashiba agi, tang alima nung narongjaker nütsüng million 70 dak tali lir, aser item nütsüngji Tsüngrem O agi ayimjemtsüji kanga tongtibang.

Ajisüaka tenarong tajakpurtem dang masü saka tenarong agi junga

mangashirtem densemabo nisung million 400 dak tali alitsü, ta karibo asadangteter.

Tang alima nung Khrista osangtajung agi mayimjemba telok tulutibatem rongnung narongjakertem densema lir, ta organization ana-RevelationMedia aser International Mission Board (IMB) nati metetdaksü.

Alima nung narongjakertem shilem 2 shi dang Khrista osangtajung agi ayimjemogo.

RevelationMedia tentetsang aser CEO, Steve Cleary-i, "Alima tesem aika nung narongjakertem ya 'second-class' sensotem ama züngshir. Tenarong agi angashibapurtem den parnok junga sendaktepa mali aser parnok aikati parnok sendoker mesüra memeimer ama bilemer," ta metetdaksü.

Paisa, "Onok indang mission ji parnoki (narongjakertem) angatettsüsa parnok ket nung visual format nung Khrista osangtajung agütsüba ajanga parnok nem teimla agütsütsü atema lir," ta metetdaksü.

Iba project nung iBible atema yangluba production technology amshia lir.

International Mission Board staff administration nung tongti, Victor Hou-i, "Narongjakertem nem Laishiba meyipzükja Tsüngrem O angatetdaksütsü atema technology amshia inyaktsü asoshi onoki RevelationMedia den longjemba atema pelar," ta metetdaksü.

RevelationMedia-i episode 24 adoktsü aser ibaji Luk kaket nung tapu kaka asütsü. ASL nung Luk kaket indang natural sign-language animation mezüngbubaji ibai asütsü.

Luk mezüngbuba tapu tembangba sülen 'scenes' ji sign language 300 dak tali nung adoktsü, aser ibaji ajanga narongjakertemi peipei oshi nung osangtajung angatettsü.

Cleary-i, "Iba project tasenba ajanga alima nung narongjaker million 70 dak talii osangtajung meteta akümtsü. Iba mangdang atangji atalokdaksütsü atema IMB ama den longjemba atema onok pelar," ta metetdaksü.

ANOGO ABEN TSÜNGREM DEN

Mapang ka nung

Kechiaser Tsüngrem den kecha tamakoktsü mali. Luk 1:37.

Ibai shitakba asü tebilemba dang ? Aiben asenoki anaji mebendangtetter. Tsüraburi tanurtem dang jangratemtsü otsü ashir, kechiaser iba jagi parnok ajungmesor. Parnoki ibaji teti azünger aser otsüji tanurtem asoshi shitakba akümer.

Asenok mapang Santa Clausji shitakba aser takar ka kümdaktsür saka, kinü Yisu soa alibajibo mangur. Easter nung entsü agütsüteper saka aika asoshi aji leper tazüng agi melen. Nisungi yangluba jangratemtsü otsü shitakba ama agizüker süra Laishiba nung aliba otsü ochi otsü ta agizüktsübaji tesüngmangtsü masü na?

"Ken mapang" Yisuji shitakba aso, taküm ali, süadok aser shia aru. Ajakji Tsüngremi shitakba temenen nungi kümzüktsü, kümtetdakba ka agütsüba aser taküm nung Kibur ka agütsüba lir. Iba otsü shijen ashitsüji koda ochi!

Parnokji item o agi dangbo metenzüki alitsü akok, saka Laishiba nung shitakba otsü aika lir, tazüngtsü jangratemtsü, tayongzükba aketba. Laishiba nung "ken mapang ka nung" ta aliba otsü aser Tsüngrem teti tatem maka ochiba indang item otsütem ajanga jembidang, tasüngtet Mary sarasadem asenok sarasadem kümdaktsüdi: "Kü indang Ne o amaji lidakjang".

'Eternal Wall of Answered Prayer' mezüngbuba shilem renemogo



The Eternal Wall of Answered Prayer

September 25, 2026: shia nungji Tsüngremi Europe nung Khristan maitsü sarasadem langzüba otsü kaka tuluka yanglutsü atema küm alitsü. Nisungtemi sarasadem aika tejaklen mangdang yua langzüba otsü 10,000 dak tali lemsatepogo.

tenzüka kobi melii renemtsü. Küm shia nisung 800,000 'The Eternal Wall of Answered Prayer' yanglutsü reprangtsü imlar.

atema Richard Gamble-i Yaküm iba monument apiteta liasü. Pa ya tamalen yanglu tenzük aser Leicester City football club mezüngbuba shilembo nung chaplain liasü. renemogo. Iba monument ya

Iba nüngshi yanglutsü 2029 küm nungbo lapoktsü. atema 2004 küm pai apiteta Gamble-i, "Küm 20 dak tali liasü. Birmingham anasa ni Eternal Wall ya nükla nung, Coleshill nung Eternal Wall of noksa aser computer screens Prayer yanglutsü atema nung dang repranga liasü, temelaba agütsü. Jaraji Möbius ajisüaka tanübo atangji iba strip ama asütsü aser lungru tamendakdakbo renemogo," ta million kati yanglutsü. Lungru metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Helimelia


(v) kanga mazüingi (very busy)

* Tetsür telok ka helimelia soruchioka liasü.

Jangkonük

(n) pei apuani yur tangar nukshiba (flirty eyes)

OLONG PAITEP # 7661



TIPIEN

- | | | | |
|---------------------------|-------|-------------------------------|-------|
| 1. Aiben | - (4) | 2. Tulu masü | - (4) |
| 5. Amua onüba yimya | - (6) | 3. Azü jajaba shilem | - (4) |
| 6. _ _ _ _ _ daksu | - (5) | 4. Tetsür maki-i aliba tambur | - (9) |
| 7. Yashi aonung | - (6) | 6. Khuret | - (9) |
| 10. Lapok | - (4) | 7. Jila tulu | - (5) |
| 11. _ _ _ _ _ n | - (4) | 8. Kasa | - (4) |
| 12. Azü ajemba shiruru ka | - (6) | 9. Tsuk tekup mali | - (4) |
| 15. Pi/tangar | - (5) | 13. Tekolak ali-i alu | - (4) |
| 16. Khu mali | - (6) | 14. Tzü shiruru ka | - (4) |
| 17. Bangsemo endok | - (4) | | |

LANGTSÜLEN

OLONG PAITEP # 7660 TELANGZÜBA

TIPIEN :

- | | |
|---------------------------------------|--|
| 1. Aben, 4. Artsü, 7. Lisem, 8. Liwa, | 1. Aruli, 3. Balala, 5. Suwar, 6. Belem, |
| 9. Sarasadem, 12. Aket, 14. Mangu, | 9. Süjak, 10. Aonung, 11. Dokan, |
| 15. Anünü, 16. Ango. | 2. Tinu. |

LANGTSÜNGLEN :

NAI-A YA METETTER MA



Arishi küm 16 tain Thai rock singer aser guitarist Nene Royal-i America's Got Talent 2026 takok marok nguogo.

Nene Royal tenüng chichiba ya Rattikarn Amloy lir aser September 23, 2026 nü grand finale nung lai tematiba takok ngua US\$1 million agizükogo.

AGT 2026 nung Nene Royal-i Cranberries indang "Zombie", Muse indang "Hysteria" aser White Stripes indang "Seven Nation Army" kentem aten. Laisa The Warning aser Linkin Park bands den külemi shilem agiogo.

Meghalaya teloktemi Deobarnü bank lapoktsü memulunger

Shillong, September 25, 2026 (Agencies): Centre-i September 27, Deobarnü bank lapoktsü lemtetba anema Meghalaya nung telok aikati ola adoker.

Khristantem teimba ser aliba state nung Deobar ya temeshi anogo ka lir anungji bank temi iba lemtet meyipa reprangshitsü mepishir ta Confederation of Meghalaya Social Organisations (CoMSO)-i metetdaksüogo.

Iba ya bank tem dangi "final

notice" lir aser Deobarnü lapokra onoki lokti jazüka lungkak aittsü ta CoMSO general secretary Balkarin Ch Marak-i ashi.

"Meghalaya nung alirtemi administrative convenience tenüng amer mezügmeshiba magizüksü" ta Marak-isa ashi.

Meghalaya nung Deobar ya tekülem anogo ka lir aser iba anogo nung kinungertem aser lokti ajurutebpa anogo ka lir.

Anungji bank temi state nung tamangba yimsü aser lokti inyakyim akhümtsübuttsü ayongzüker ta CoMSO-isa ashi.

September 28 nungi 30 tashi linük ajungalen bank strike asütsü aliba jakdang Centre-i September 27 nü bank ajak lapoktsü tetuyuba agüja lir.

2011 Census ajanga Meghalaya nütsüng yongsük nung 74.59% Khristantem lir ta shia lir.

NIA-i Aizawl nung Kuki nunger kaketshir tanishir 2 apu

Aizawl, September 25, 2026 (Agencies): Manipur nungi National Investigation Agency (NIA)-i Kuki nunger kaketshir tanishir ana Aizawl nung puogo.

Aizawl nung Khatla area nung hotel ka nungi tena apu. Assam Rifles teyari agia Aizawl nung NIA-i United Kuki

National Army (UKNA) tanishir Thangkhomang Haokip aser pa driver apuba sülen ghonda ishika lir kaketshir tanishir ana apu.

Kaketshir tanishir ana den Haokip aser par driver nunger ajak NIA ket nung lir ta ketdangsür kati ashi.

Haokip anema Manipur nung ken o aika benoka lir. Ajisiüaka kaketshir tanishir ana ya kechi ken o atema apu ano memetetdaksü lir.

Iba maparen nung Subsidiary Intelligence Bureau (SIB) shilem kecha maliasü ta ketdangsürisa ashi.

Mizoram CM Lalduhoma-i ZPM president inyaker

Aizawl, September 25, 2026 (Agencies): Zoram People's Movement (ZPM) nung president inyaksü atema Mizoram Chief Minister Lalduhoma shimogo.

ZPM-i 2026-28 kümsük atema ketdangpur tasentem metetdaksüdang Lalduhoma shimba osang lemsatep.

Lalduhoma-i Lalliansawta nungi iba mapa melenzüker.

Lalliansawta ya temang majungba agi mapang tatsüka mapa meinyakteti aru.

ZPM office nung ZPM Val Upa Council (VUC) Secretary Thangchungnunga-i iba osang metetdaksü.

"Chief minister-i party president inyakba mapa tasen ya ruling ZPM-i tendangtsü aser mejungra akhi ama alternative system kati

melentsü" ta Lalduhoma-i ashi.

Chief Minister aser party president na külemi inyakba ya majung ta ZPM-i bilem aser küm aika yamaji dang aruogo. Ajisiüaka party lennirtemi iba inyakyim tasen nung tajangzüker tuluba lir ta lemtetogo ta paisa ashi.

"Onoki iba inyakyim tasen tendangtsü. Mejungra inyakyim tajungba ka tenzüksü" ta CM Lalduhoma-isa ashi.

BJP-i 2028 nung chichiba tetendangba ajurutsü: Vincent Pala

Shillong, September 25, 2026 (Agencies): BJP-i 2028 Assembly election nung chichiba tetendangba ajurutsü ta Meghalaya Congress president Vincent H Pala-i ashi.

Meghalaya assembly nung parnok nübo teimba akümba yagi voters teimba angutsü asü ta pai asüngdang.

MLA temi BJP nung adenba ajanga parnok tashi angu aser

iba ajanga Meghalaya nung parnok pusemer lir ta mesayur ta Pala-isa ashi.


United Democratic Party (UDP) MLA 8-i BJP nung adenba sülen anogo ana lir Pala-i iba olen metetdaksü.

"Parnok asoshi chichiba tetendangbaji 2028 küm asütsü. Parnok MLA tem alitsü akok saka nübortemi parnok yaritsü asü masü ibaji asenoki ano

mangu" ta paisa metetdaksü.

Meghalaya nung BJP ulushiba atema Congress-i shisabulua mebilemer. 2028 election jakdang BJP meyarinürtem dak onoki temulung agütsütsü ta Pala-isa ashi.

"BJP-i parnok medemertem aser külem yaritepertem dak iba ama inyakba ya aitsür" ta Pala-isa shisem.



Northeast Frontier Railway (NFR)-i September 21, 2026 nü at Guwahati aser Kamakhya station tem nung water samples bendena tendangogo. Ketdangsürtem station anaprong nung tesem balala nungi water sample bendena pH, turbidity, total hardness, nitrate, iron, residual free chlorine, chloride, alkalinity, fluoride aser calcium tendanga liasü aser physicochemical results shitak dang ngutetogo. NFR-isa mapang shia water storage tanks merükteter aser water coolers, pipelines, taps aser tanga water-supply installations reprangshimer. Parnokisa water sampling, laboratory examination aser residual-chlorine monitoring asür.

SÜR KÜM 5 AJUNGBA MENUNGRAA BILEMTETER TSÜRAPUR : LT.TSUKNUNGPOKLA CHUCHUYIMLANG

Temeim Oja, na iba lima nungi onok toktsür or küm 5 tashi süitema oaka, nü temeim mapatem, nü shisa tongmelang tesayuba, Tsüngrem dak ochi tamang agi azüita amangba, item mapa tajung ajak tu onok mulungjang nung teti yua lir aser item jagi onok taküm nung len anidaktsürani.

Oja na tanü onok den taküm nung meliaka nü sarasadem olatu onok mulungjang nung teti bilemtetdaksür, Oja na pungmangdangbo onok temoatsüsa asürani .

Oja onoki na kangasa menungrarako.

~ Temeim Chirnur, Semchirtem aser Kinungertem.



TASÜBA ANOGO
26/09/2021

Office of the
Aoli Longpok Semchir Lemtur Mungdang

H.Q: Mokokchung

TENÜNGSANG AGÜTSÜR

Miss Imsunungla Lemtur, D/o Mr. Pusutemjen Lemtur aser Mrs. Yangersongla Pongentsür, Longmisa yim nungi NITTE USHA Institute of Nursing Science 2022-25 III year batch nungi academic topper takok tulu ngutetba atema tenüngsang agütsür.

Teyanglur Tsüngremi tarutsü nung ne wadang ano maneni takokma nung aniangma.

Sd/-
Lipokyanger Lemtur
President, ALSLM

Sd/-
Tayongtemsü Lemtur
G/Secretary, ALSLM

To,
The Officer in-charge,
East Police station, Dimapur
Subj: LOST OF DOCUMENT (GIFT DEED)

Sir,
With reference to the subject cited above, I have the honor to report to you that on 21/09/2026, while I was marketing at supermarket the documents which I was carrying, was lost. As such when I checked I found that the documents which was lost, included Gift deed between Mrs Shurhini-u mepfhu-o, W/o Kelhouyielie (donor) and me, Bearing Patta No. 7, Dag No. 132 at Nagarjan village under Mouza no. 3 Dimapur town. (Copy enclosed)

I therefore request your kind authority to kindly take necessary action and issue me a copy of police certificate for the same, for which I would remain ever grateful to you.

THANKING YOU, IN ANTICIPATION.

Enclosed; As stated
Dated; 24/09/2026
Dimapur

Dimapur East Police Station
GDE No. 09/26
Date 25/9/26
Time 12:40 hrs

Yours sincerely,

T. Purni
(THERUOVILLIEN MEFHU-O)
S/o Kelhouyielie,
H/no 517, Kuda village,
Nagarjan Dimapur
(#7630899734/7005162367)

Israel inyakyim bhukuma Netanyahu-i UN nung jemb

United Nations, Rongjui/Sept. 25 (Agencies): Region nung Israel inyaksangshi bhukuma Ato Kilonser Benjamin Netanyahu-i Brehostibarnü UN nung jembia pai tamakok angutsü südi ta bilema aliba elections agitsü lia linük balalai senzüka yutsüba nembangtsü meranga liasü, kong delegates tem mungdang nungi ayazüka ao.

Pai o jembia tenzükdang linük balala ketdangsürtem ayazüka aoba ajanga Netanyahu-i tebilemtsü tali ajuruba sayur, shiba Gaza rara mechi linük aikati aitsür aser kasa mapang October 27 nü pa ano ato kilonser asoshi toktepa nübuyimer.

Netanyahu-i o jembia tenzükdang Israel inyakyim mechi telemsa adoka aliba ajitet, kong delegates aika longkak aita ayazüka ao. Pai parnok dang "moral cowards" ta aja aser gallery nung pa bhukumer temi Hebrew oshi nung "Israel nüburtem alir" ta ayimtena liasü.

New York Mayor Zohran Mamdani-i pa dang "war

criminal" ajaba atema pai iba sapang nungi aitsü, Western European lenirtem Jewish nunger anemba nem kokdaktsür ta ashi aser Qatar aser Turkey nati Israel indang tiazü prokshir ta aitsü.

"Ni yagi aruba nokdangtsü nai merang. Nai merang. Nai ni ola madokdaktsütsü merang. Ajisüaka nai ni ola madokdaktsütsü makok. Nai ochi menembangtetsü," ta Israel nung lenir talangtiba inyaksang Netanyahu-i Mamdani dang ashi.

Mamdani ya New York mayor asoshi nübuyimba mapang Netanyahu-i US nung yimti tulutiba ya semdangra war crimes mechi aputsü ta nangzüka liasü saka mapang tatsüka lir pai yamaji inyaktsü pa dak tashi peria mali ta shia liasü. Tan hopta ang Mamdani-i Netanyahu ya Palestine nunger ajunga samatsütsü merangba architect lir ta shia liasü.

Mamdani ya January ita New York mayor akumba sülen Netanyahu-i tang mezüngbuba

Rara tembangtsü US dak keta lir: Pezeshkian

New York, Rongjui/Sept. 25 (Agencies): Tehran-i joko meraraner aser rara tembangtsü atema telemtetba agitsü ya United States dak keta lir, ta Iran Tir Masoud Pezeshkian-i ashi.

Fox News den sensaksemba Brehostibarnü sayuba nung, Iran-i Washington den mangatettep ya maneni raraba ajanga masü saka jembishinü ajanga angatettepner, ta Pezeshkian-i ashi.

"Asenoki jembishinü ajanga angatetteptsü akokba ken o yur asenok kati ka metepsettsüla. Ajisüaka Israel-i nungshiba ajanga parnoki onok den rara ya tenzü," ta ashi.

"Onoki joko meraraner. Iba rara tembangner mesüra metembangner, aji America nungeri shimtsüla."

Pezeshkian-i UN General Assembly nung jembidang, Washington matsüngdang Iran mapudaktsü ta shir anogo ka lir tang pai iba o ya jembia liasü.

Pai yamaji yimjak nung tashi mangatsü shiaka US Tir Donald Trump den tangatettep kati arutsü Tehran mulunga lir ta ashi.



Pai kechiba taoba mapang renemba ceasefire meyongnem agütsür mapang tatsüka nung raksa ta asüngdanga liasü.

"Parnoki kechiba tenzüngzüktep nung meyongnem agütsür hopta ana tsüngra raksatsü mulungtet?" ta pai ashi.

International legal frameworks kübok US sorkar inyaktsü renema lira jembishinü asütsü Tehran-i agizüktsü, ta Pezeshkian-i ashi.

"US midterm elections matongdang mesüra elections sülen, ajiaki onok atema kecha telemdang lir?" ta pai ashi.

Pezeshkian-i Iran aser Yemen nung Houthi movement tsüngta tesendaktep aliba indanga jembia liasü, koba Iran tembar ta züngshir.

Houthis-i Tehran totuyuba nung inyaker masü, iba telok ya balaka inyaker, ta pai ashi. "Houthis tem parnoki inyakba atema par khuret lir. Parnoki onok nungi totuyuba magir aser tensa apur region nung tangartema yamaji inyaker," ta Pezeshkian-i ashi.

Tehran ya iba telok den contact lir saka parnok den tesendaktep balaka mali ta pai ashi. "Onoki parnok den tongteprateper. Tesendaktep balaka mali," ta pai ashi.

Houthis aser Saudi-i nungitba sepaitem tsüngta raraba ajanga region nung tensa tali tamajungba kumer lia pai iba o ya ashi, kong Saudi Arabia-i Houthi ballistic missiles anünglak nung lia khazüka yokba osanga lir.

Trump aser Xi o tajung jembitep, saka tongtipang onük nung terenlok mali

Washington, Rongjui/Sept. 25 (Agencies): White House nung state dinner aliba mapang US Tir Donald Trump aser China Tir Xi Jinping na o tajung jembitepa liasü, saka tongtipang onüktem nung terenlok alibabo majitet.

Xi-i iba sentong nung jembidang parnoki AI ya nisungi azüoktettsüsa

südaktsütsü aser khuret abenba linük ama inyaktsü indang jembia aser Trump-i tarutsü nung linük ana tesunep, yimjung aser takok nung alitsü indang ashi.

Tesendaktep junga lir amai süaka Taiwan densema mangatettep lir - kong anüngdang senden amendang XI-i Trump dang iba asetkong nung mera shidak agitsü ajungshia liasü, koba Beijing-i par meyong ta ashir aser Trump-i iba asetkong nem nok-nü agütsüba soita lir.

Küm ter dak tema nung tang mezüngbuba Xi-i US semdangba mapang Trump-i China lenir jangratema tushia amshi aser iba chiyongba sentong nung adenertem dang linük ana systems balala süaka tena tesendaktep tangsa tajungba lir ta shia liasü.

Kasa mapang Xi-ia US-China tesendaktep nung otsüsütsü lemjem pela agizük aser Trump tenaprong mangdang ya arok tashi itshitsü atema asütsü ta ashi.

"Asen nüburtemi imlaba ama inyaktsü, asen tendang yimya-koya sülen lirumedema alitsü, aser linük tulutem putepa aotsü asoshi mera tasen agitsü atema China aser United States ya khuret abenba linük tulutem ama inyaktsüla," ta pai ashi.

Xi-i Trump tena temulung taroktiba nungi shisatsü lemsatepa ken o aika nung tangatettep kati aruogo ta ashi saka alima nung tashi tulutiba linük ana indang lenirtem

tsüngta telemsa adoker aliba ken o tongtipang tem indangbo mesüok.

Parnok ya superpower ka akumtsü aliba US-i azüoktsü meranger ta China-i amanger aser par lenmang nungi Washington pila lidaktsüner, talisa shishilempaba, technology aser Taiwan tsütsü anasai marudaktsüner.

Trump yagi iba mapang shishilempaba nung tezüngzüktep agia China-i America nunger oset nung tariffs meshiba ajemdaktsütsü, China indang rare earth minerals bener aruba tali akumtsü aser US agricultural products yokba tali kumdaktsütsü aser tezüngzüktep yanglutsü südi ta imlaa liasü.

Osangbener maden kishi shibanger jembishinüba mapang Xi-i Taiwan ken o kanga kumdanga ketdangsütsü Washington ajungshia liasü, ta Chinese state media ajanga shir ghonda ishika lir chiyongba sentong ya ayongzüka liasü.

Taiwan par sasa kumzüka ayutsü atema nüngdakba US-i agütsütsü özüng lir, saka May ita Xi-i iba ken o meshidaki ketdangsüba ajanga linük ana tsükteptsü mesüra raratsü akok ta Trump dang tekumdangtsü ashiba sülen Trump-i Taiwan nem sen \$14bn jenjang nok-nü agütsütsü memelai soita yua lir.

Iba mapang Trump-i Beijing den jembishinü akatsü atema iba onük ya tamdak dak tajung ka lir ta shia liasü.

(Maneni tapak 8 nung...)

Savage Setters V/Club Chungtia-i 19th Imchaba Nagaland Open V/ball Trophy benogo



Champion team Savage Setters V/Club Chungtia den tetushi tejaoker Minister Metsübo Jamir aser MDVA ketdangsürtem külemi tangokba noksa nung angur.

Mokokchung, September 24, 2026 (TYO): Taküm 19 buba Imchaba Master Memorial Nagaland Open Volleyball Trophy 2026 Savage Setters Volleyball Club Chungtia-i benogo. Final match yangi Multi-purpose Sports Complex, Mokokchung nung asayadang, parnoki MH-10 Kohima madak points 18/25, 12/25, 25/22, 25/22, 15/12 agi koka liasü.

Savage Setters V/C Chungtia ya taküm ang tentetba team ka sürnung tawa tembangba 14th Luke Sasong Memorial Volleyball Trophy 2026 nunga par teloki final tashi atong aser tangjia final-i ia takok tulu nguogo.

Tawa tembangba 14th Luke Sasong Memorial

Volleyball Trophy champion Changtongya Volleyball Association pur tasembuba jenjang aser Unicorns Tuensang pur pezübuba nung liasü. Iba asaya nung CVA-i 15/25, 25/17 aser 15/13 agi Unicorns madak takok angur.

Mezüng semifinal nung SSVCC Chungtia-i Unicorns Tuensang pur 25/13, 25/20 & 25/19 agi akok aser tanabuba semifinal nung MH-10 Kohima-i Changtongya Volleyball Association (CVA) pur 25/23, 25/21 & 26/24 agi tsükdaktsü.

Champion telok nem Rs. 1, 00,000/-, Runner-up nem Rs. 70,000/-, tasembuba aser pezübuba nem Rs. 30,000/- aser Rs. 20,000/- agi senpettsü. Iba den külemi neja senpet -

Best Spiker: Wonglem (SSVCC)

Best Setter: Limatenzük (SSVCC)

Player of the Tournament: Obika (MH -10)

Emerging Player: Sentianger (MH -10) ta shima parnok ajak nem senpet sen 5000/- agütsü.

Iba trophy ya Mokokchung District Volleyball Association (MDVA)-i kümshi ayongzüka akar. Taküm iba asayamung nung Nagaland tesem balala nungi telok 14 adenshia shilem agia asayaago.

Asayamung shibangba aser senpet agütsüba sentong nung Nagaland RD & SIRD Minister, Metsübo Jamir tetushi tesemdanger liasü.

Asian Games 2026: India-i gold ana buba ngutetogo

Nagoya, Rongjui/Sept. 25 (Agencies): India asoshi Aichi-Nagoya Asian Games nung anogo tajungtibaji Hokulbarnü liasü, kong gold ka, silver ana aser bronze medals asem ngua ajak agi medals 23 (2 gold, 9 silver, 12 bronze) nguteta lir. Iba den kabaddi team tem final asayatsü jangjaogo aser tetsür hockey team tang tashi tamakok majurui semifinals tongogo.

Suruchi Singh aser Kamaljeet nati Games indang shooting nung India asoshi mezüngbuba gold nguteta 10m air pistol mixed team final akok. Iba sülen Aishwary Pratap Singh Tomar, Rudranksh Balasaheb Patil aser Niraj Kumar nungeri 50m rifle 3 positions men's team event nung tanabuba jenjang tongtet, kong China temaba aser Korea-i bronze angu.

Gulveer Singh-ia kanga junga asemteta mapang 28:29.38 nung tebur 10,000m final tanabuba jenjang angu.

Table tennis nunga tarep temeyoktep semifinal asaya nung India nunger Manush Shah aser Diya Chitale na China nunger Chuqin Wang aser Yingsha Sun nati koka bronze angu.

Manpreet Kaur-i tetsür shot put nung bronze angu, kong China-i gold aser silver agizüka liasü. Nikongdang tetsür pole

vault nung Baranica Elangovan-i 4.25m alemteta bronze ngua liasü.

India nunger kabaddi team anaprong finals tongogo. Tetsür telok ya iba asayamung pezü buba nung ashidena gold angutsü arishir aser parnoki semifinal nung Nepal madak 48-24 agi akok aser tebur temi Thailand madak 66-28 agi koka liasü.

Tetsür hockey team-i iba asayamung ayonger Japan madak 3-1 agi akok, kong Lalremsiami, Ishika aser Navneet Kaur nungeri goal ka-ka agüka Pool A nung parnok tamakok majurui semifinals tongogo.

Squash nung Abhay Singh aser Anahat Singh na singles semifinal tongogo aser ano Joshana Chinappa aser Velavan Senthilkumar natia tarep temeyoktep nung medal kabo angutsü tejangja nung lir.

India tsür Kiran aser Prachi na tetsür 400m semifinals tongogo aser tebur 400m nung Vishal TK-a semifinals tongogo.

Badminton nung Treesa Jolly/Gayatri Gopichand Pullela aser Dhruv Kapila/Tanisha Crasto nungertem round of 16 tongogo aser Unnati Hooda-ia tetsür kija asaya mezüng buba nung takok nguogo. Boxer Sachin ya tebur 60kg quarterfinals tongogo.

IPL auction Goa nung December ita agitsü

Rongjui/September 25, 2026 (Agencies): Board of Control for Cricket in India (BCCI) secretary Devajit Saikia-i sangdong ka ajanga IPL 2027 auction taküm December ita Goa nung agitsü ta metetdaksüogo.

IPL auction ya küm asem tashi bendanglen oa tesem balala nung agiba sülen BCCI-i 2027 küm IPL auction India nung agitsü telemtetba agiogo.

"Taoba küm asem Saudi Arabia, Dubai, aser Abu Dhabi nung IPL auction agiba sülen takümbo onoki December ita Goa nung ayongzüka agitsü," ta Saikia-i ashiba, ANI sangdong ka ajanga metetdaksü.

Taoba küm asem tashi auction ya Dubai, Jeddah (mega auction) aser Abu Dhabi nung agiogo. IPL team tem aika season tasenba metenzük tsüngda team yanglushiba mapang tang iba osang ya sangdongogo.

Rishabh Pant Delhi Capitals (DC)-i meyipaogo aser Kuldeep Yadav Delhi Capitals nungi Lucknow Super Giants (LSG)-i ogo. Franchise ana tsüngda nüngtugu asayar ana ya melentepa liasü.

Chennai Super Kings-i taoba mapang India nunger fast bowler Zaheer Khan parnok indang head coach asütsü shimogo. Kolkata Knight Riders pura Ajinkya Rahane asaya nungi anisüngzüka sülen captain tasen ka sangdongtsü lir. Mumbai Indians puri Zubin Bharucha, director of performance asütsü shimogo.

BCCI-i, IPL 2027 season atema retention deadline tang tashi sangdonga mali, koba yimya agi November tatemlen asür.

2025 aser 2026 küm IPL title abenba sülen Royal Challengers Bengaluru pur defending champions ama taruba season asayatsü.

BENDANGLI OSANG :

Tapak 7 nungi...

Israel inyakyim bhukuma Netanyahu-i...

Qatar-i Israel anema yimten tangatetba melenshitsü lenmang bushir ta Netanyahu-i tai tongloksüba Doha-i magizük aser par foreign ministry odongtar-i social media X nung, Netanyahu-i tanen makai Qatar anema jembiba ya par lima nung inyakba nung temulung agüja aliba nungi piladaktsütsü asoshi lir, ta ashi.

Turkey Tir Tayyip Erdogan indang communications director-ia Netanyahu-i Turkey aser Erdogan aitsüba ya tamendak dak maka ta ashi.

"Netanyahu-i ozü tir anema sensamasa o jembiba ajanga pai Gaza nung nisung aika tepsetba aser meinchir timtem lendong tulu ajangshia aliba menembangtet mesüra international law amshia ken o benoka jembiba menokdangtet," ta Burhanettin Duran-i X nung ashi.

General elections agitsü hopta pongu majung lia Netanyahu-i UN General Assembly nung minute 40 shi nübuyimer ama jembiba ya Israel nung television channels tulu pezü prong nung live sayua liasü.

Netanyahu-i jembitsü lia par sorkari Israel bhukuma aser Iran anema billboards 500 inoktsü aser Israel bhukuma o züluba trucks aika Manhattan nung senzütsü asoshi sen agütsü, ta Netanyahu indang office-i sangdong ka nung ashi.

Longkak aiter noklang ishika United Nations anasa adenshia kari traffic mokdang aser "Israel nem nok-nü agütsüba anenang, Gaza lidakjang" aser "Israel nem nok-nü agütsüba anenang, Iran lidakjang" ta ayimtema liasü. Police-i longkak aiterem ya apu.

Netanyahu ya UN nung jembitsü atema mapang tatsüka

asoshi US semdang aser US Tir Donald Trump den senden amentsü sentonga meliasü, saka pai Trump tenüng sanga jembiba.

"Onoki maneni ozü linük kumzüka ayutsü. Onoki maneni akoktsü, kechiaser tanga lenmang maka. Sobaliba maka tazü nisungtem den raraba nung, Tir Trump dang tajungba tembar mali. Ni pa dang pelar. Pa dak tasü tait mulungsentsü aliba atema ni pelar," ta pai ashi.

Küm asem shi jakdang Hamas-i anir Israel amakba langzüa Gaza nung rara tenzüka sülen Israel ya linük balalai senzüka yutsür.

International Criminal Court-i 2024 küm pa aser iba mapang pa indang defense minister inyaka alisang aputsü totuyuba agüja aliba mechi Netanyahu ya linük aikati moteter.

FILEMDANGANG

"Anütetsü repranga makazüi tejakleni oang."